

D E S C R I P T I O
F R E T I M A G E L L A N I C I
E T
F R E T I L E M A I R E.

Provincia
Magellani-
ca.



Provinciarum Freti Magellani nomine eae regiones continentur, quae à fluvio *de la Plata* ad mare usque Australe porriguntur, inter limites Praefecturae Chilens & Fretum ipsum. à gradibus altit. 42 aut 43 ad grad. 52, & ultra. Quanquam vero haec ab utriusque maris littore aditae fuerint saepius, deprehensumque sit eas inhabitari, in hunc tamen usque diem in provinciarum formas redactae non sunt, nec ulla in has deducta Colonia, praeter eam, quam huc deduxit Diego de Valdes, in ipsius Freti ostio, ad latus ejus Septentrionale anno 1582, vocaturque colonia ista urbs *S. Philippi*, quae tamen hic loci propter nimium, ob poli vicinitatem, frigus, servari non potuit. Estque periculosissima in has terras navigatio, propter perpetuas, quibus hi tractus infestantur, ventorum tempestates.

Inventor
primus F.
Magellanus.

Primus fretum hoc transiit Ferdinandus Magellanus, Eques Lusitanus, à cuius nomine nomen accepit, vulgo *Estrecho de Magellanes*. Is siquidem vigesimo quarto Augusti, anno 1520, solvit ex sinu *S. Iulian*, in quo aliquandiu haeserat, non solum tempestatibus, hyemisque incommodis impeditus, verum etiam dissidiis contentionibusque inter Lusitanos ac Castellanos ortis. Postquam aliquot dies in Austrum navigasset, ventum est ad promontorium *S. Cruz*, ubi menses duos commoratus fuit, amissa navi una, salvis tamen vectoribus, armamentis, & mercibus. Inde cum observaret littora ab Austro in occidentem flecti, spes facta est freti consequendi. Itaque promontorium *de las Virgines* (nomen illud indidit, quod festo *S. Ursulae* huc appulisset) praetervectus, 26 Novembris fauces quasdam ostiaque deprehendit, quas cum quatuor reliquis navibus ingressus est; deprehensumque mox, ex maris hic fluxu ac refluxu, Fretum esse. Dextra laevaue in littore solitudo, mortales nulli; nisi quod in parte sinistra conspecta fuerit magna ignium copia: quae causa fuit, cur & regionem illam vocarent *Terram del Fuego*, & judicarent se ab incolis esse conspectos. Magellanus, quamvis duabus navibus amissis, tres reliquas prout potuit instruxit, & lustratis prope rebus omnibus, secundo & vigesimo die postquam fretum ingressus fuerat, delatus est in aliud mare, quod à tranquillitate vocavit

Mare Pacificum. Ceterum fretum hoc altissimis undique rupibus cinctum, CXX pass. millia in longitudine occupat, vel secundum alios LXXVI miliaria. Latitudo non respondet, verum alibi major minorve, nonnunquam decem aut quinque miliarium, quaque angustissimum, unius miliaris. Ipse Septentrio ex orientis latere inter utriusque terrae angustias per 70 & amplius passuum millia invehitur, Australibus undis miscetur, quae ab occidente promontoriis illis *Desiderado* sive desideratis insinuatæ, Septentrionalibus aquis occurrunt, magnoque sibi invicem impetu obviis, horrendo fragore totum in spumas vertit mare. Placidus Auster fluit refluitque, nam occidentis haec pars, cum incredibilis sit profunditatis, extenuatisque littoribus majorem in modum se terra aperiat, quietum fluitanti mari accessum praebet. Sed orientale hujus freti littus, vadis brevibusque infestum, interjacentibus pluribus insulis, frequentibus aestibus agitur, & ingentes aquarum motus ciet: littora altissimis arboribus consita. Porro Magellanus dum in Australibus hisce partibus per semestrem circiter spatium haesit, nihil fere praeter littora derexit & perlustravit; interiora regionis penitus incognita mansere. Deprehensum autem postea navigatione Richardi Aquinatis à latere Australi Freti continentem non esse, sed insularum congeriem interfuso mari.

Fr. Draeck.

Post hunc anno 1577 Fretum transire instituit Franciscus Draeck, qui ex Anglia solvens 13 Decembris, 20 Augusti anni sequentis 1578 ad fretum pervenit, ubi adversantibus ventis aliquandiu ab aditu prohibitus, tandem flante Casia Fretum ingressus est, & 24, insulam, quam *Robben* vocant, in Freto ipso jacentem, praetervectus, nec ullo ventorum incommodo retardatus, felicissime Fretum emensus est. Sexto siquidem Septembris in mare Australe pervenit, ubi ingruente procellarum vi à se invicem divulsae naves, moxque iterum collectae, iter versus Thraciozephyrum & Septentrionem instituerunt, ac sic littora legentes in Chili, prope urbem *S. Iago*, pervenerunt, ulteriusque navigationem persecuti sunt.

At simulac rescivisset Prorex Peruviae Franciscus de Toledo, Franciscum Dracum per Fretum Magellanicum in mare Australe delatum passim circa ejus littora ferro ac igni obvia quaeque populari, duas naves instrui jussit, duce *Petro Sarmiento*, qui postquam è *Callou de Lima* solvisset 11 Octob. anni 1579 Fretum subiit, multarum insularum congeriem ac velut Archipelagum